

PILIMON

Pol Rii Pilimon Riina Har Jey Maji

¹Ada eeta Pol. Ada Jisas riiti hik poko jichawa ma. Ada noti kumwoy yaka Timoti riitaka diita jey keyichi Pilimon miina hato. Miita noti kumwoy yaka siiken nota yo kiki otiito. ²Sicha, sichi mowey, Apia, siina Akipas riitaka keyichi habato. Akipas rii notaka ow ana pi ma tawa.

³Eeta kepi noti Apoko God riita Harapa Jisas Kraist riitaka kwona rukusiitanak, kwoti inyagak wopu otii kwoya hiki takiita.

PILIMON RIITA RUKUSII TAWA MAJI

⁴Eyey nedii ada God riina maji ba tawak, ada Pilimon miiti hin ada God riina woshiato. ⁵Ada meejito miita Harapa Jisas riina hiki siitiichichawa inyaka eena meeji tawak, miita God riiti ma mima yenya rukusii tawey, eena ada God riina woshiato. ⁶Nota Kraist riina hiki siitiichichawak, nota kepi tawak, ada God riina wohecho: miita miiti hiki siitiichichawa inyaka akar ma yenya sawo tawak, yecha eechaba Kraist riiti hadabas hokwa sokwa tawa boboy ya takiita. ⁷Ayo, miita eyey God riiti ma mima yenya rukusii tawak, miita yechi inyaka wopu kiyapo hamar. Eecha otiirek, eena ada eeji inyaka kwoya hiki tawak, eeji bii eshar tawa.

ONISIMAS MAJI

⁸Eecha otii tawak, an eecha hikitu: Kraist riiti hik ada miina yaka kumwoy tawak, anapa miina wochanak boboy kada boboy miipa keena otiikiita. ⁹Wowak, anapa sakapa eecha bakiitawak. Rukusii tawa boboy sii ana wohegiya tawak, eena an miina wohecho. Ayo, ada eeta Pol, ada apoko saba ma tawak, ada Jisas Kraist riiti poko ji ma tawa. ¹⁰Eena ada Onisimas riiti hik miina wohecho. Jisas riiti hik rii eeta eeji yikapwa. Ada poko ji akak tarek, ada riina hiki siitiichichawa maji pokii tarek, ada

riiti apokoga eeche siir. ¹¹ Mashi rii miina kiyatay yo kepi otiikasakech. Wowak, apa riipa yo kepi otiiniga miitaka adaka kiyatayichikiita.

¹² Ada riina miitak heechi tawak, ichu. Ichawak, eeji inyaka wopu riitaka eeche ichu. ¹³ Ada hadabas maji sawo tarek, ye ana poko ji akak heechir. Eena ada Onisimas riina diika heechi tak. Ada eeche otiiney, riipa ana kiyatay takiita, miiti hin. ¹⁴ Wowak, ada sakapa miina wohegiyakiitawak, ana kiyatayeken. Yaho. Miiti inyaka wopuk miita wohowunak, wonyak riipa ana kiyatayek.

¹⁵ Rii miina ameda nedii kada heechi ir. Kapo eeche tawak, miipa riin kawka yeechi yayanak, riipa miitaka eechaba eechaba takiita. ¹⁶ Apa rii yo sobo otii tawa wakasa makasakech. Yaho. Apa rii eeta harapa. Rii eeta noti yaka kumwoy siiken tawak, ada riina rukusiito. Ayo, riita eeji yaka kumwoy tawak, rii Jisas riiti hik miiti yaka kumwoy tawak, miita keena riina harapa rukusiito.

¹⁷ Wonyak, miita eeche hiki taney, ada miiti nareboy tawey, miita ana harenaka eeche otiiney, miita riina eechaba na otii. ¹⁸ Riita miina boy yikadey boboy kapaseken otiiney, eena eeji hik keyichicha. ¹⁹ Na he: ada eeji tapa siikiinek keyitu: Ada eeta Pol, ada miinapa awasen tokochikiita. Ayo, miita ana awasen ha boboyeka tawa. Eekana eeta miiti inyaka wopu saniga. Wowak, anapa sakapa eena bakiitawak. ²⁰ Ayo, eeji yaka kumwoy, Harapa riiti hik diina ana otiichi. Miita eeji yaka kumwoy Kraist riiti hik tawak, eeji inyaka wopu na kiyapo!

²¹ Ada diita keyi tawey, ada eeche hikitu ada miina wohechawey, miinapa otiikiita. Ayo, ada eeche hikitu miipa harapa yo siiken otiikiita. ²² Wonyak, aka wo poche na sayarechi heechi ta. Ada eeche hikitu God riipa meejikiita kwota riina wohechawey. Wonyak, anapa kwotak awasen yakiita.

WOSHIA MAJI KAW

²³ Epapras rii miina woshiato. Rii adaka poko ji ma tawa. Sicha Jisas Kraist riiti poko ji ma tawa. ²⁴ Eeji yo mesh mesh yo otii tawa ma, Mak, Aristakas, Dimas, Luk ye miina woshiabato.

²⁵ Harapa Jisas Kraistriiti rukusii tawa boboy sa miitaka eeche ta.